

# O LE SULU SAMOA



EKALESIA FAAPOTOPOTOGA KERISIANO SAMOA  
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

MATI 2025

email: [sulusamoa@cccs.org.ws](mailto:sulusamoa@cccs.org.ws) -Main Office: Ph. 24414, Ext 29 - website: [www.cccs.org.ws](http://www.cccs.org.ws)



*Le Fale o le Mafutaga Tina EFKS, Papauta i le aso na faapaia ai (ata a Loia Kolia FS)*



*Susuga Kapeni Matatia FS & Renolla, ma le Ta'ita'i o le Sauniga, susuga Faasalafa FT & Siline Alaovae, i le Osiga Feagaiga a le EFKS Lotofaga, Matagaluega LLA.*

---

## **O LE FAASINO UPU**

- (i). O LE LAUGA....2
  - (ii). OSIGA FEAGAIGA EFKS LOTOFAGA..4
  - (iii). FALE FOU MAFUTAGAAOAO TINA...5
  - (iv). MAFUTAGA FAAFOUINA TINA...6
  - (v). FAAUGAAOGA TUSI PAIA MALUA..6
  - (vi). O LE PEROFETA MULIMULI...8
  - (vii). O AU AFIGA O LE SULU...12
  - (viii). ASO TATALO O LE LALOLAGI...14
  - (ix). O E UA MALILIU...15
  - (x). ATA O MATAUPU O IAI...16
- 

## **O LE LAUGA**

Tusi Faitau: Ioane 15: 18 - 25

Matua: Ioane 15:19, "*Afai a ni tagata o le lalolagi outou, po ua alofa mai le lalolagi i ona tagata; a e le ni o le lalolagi outou, a ua ou filifilia outou nai le lalolagi, o le mea lea e inoino ai le lalolagi ia te outou.*"

Manatu Aoao: **Savaliga ma Iesu: Olaga Kerisiano.**

Manatu Autu o le Aso Sa 23/3/25: **O se mafutaga e alofa-inoino.**

E tuufaafegai le alofa ma le inoino. O le alofa, po o le agalelei, o le uiga faaleAtua; e loto fesoasoani ma lagolago le tasi tagata i le isi tagata i mea uma. A o le inoino, po o le ita, po o le tete'e ma faaumatia, o uiga ia faaSatani, faatiapolo, na o mea leaga, faatupu mala, e tutupu mai ai. E lē mafai ona nonofo faatasi ni tagata, e i ai nei ituaiga amio e lua, toe fete'ena'i, e alofa le tasi a e inoino le isi.

Peitai, ua tatou iloa i le olaga o tatou fanau, e tutupu a'e faatasi. O taimi uma e mafuta, e ta'a'alo i le fiafia ma le alofa o le tasi i le isi, auā o le tino ma le toto e tasi. A e i ai foi taimi e misa ai, e inoino ma ita le tasi i le isi, pe afai e tau fai manana'o uma i le mea e tasi. E finau, e leai se isi e fia toilalo, e manana'o uma, ina ia manumalo; e ala ai ona tula'i mai se mafutaga faapea: e alofa - inoino, e lelei-leaga, e filemu – vevesi.

E faapena foi i totonu o tatou aiga. O le tele lava o aso e mafuta fiafia, ona e alofa le tasi i le isi. A e i ai foi aso e tutupu ai fe'ese'eseaiga, e ita ma inoino le tasi tagata i le isi tagata; auā e tonu le tagata i lona lava ia manatu, e sa'o le tagata ia te ia lava. O le ala lea e maua ai mafutaga, e alofa – inoino.

A e a totonu o faiga malo, pei ona i ai i nei aso? O lagona ia ua malolosi tele mai, ua molimauina i tusitusiga ma aga fesoota'i – o mafutaga alofa-inoino, o tagata alofa-inoino i le taimi e tasi; ua faatusa ai nisi tagata, i le i'a o le fugafuga, o le i'a e lua ona gutu. Ua faatusa i ai le tagata e faagutugutulua. E alofa toe inoino, i le faamasinoga a le au maitau upu, le au faitau laulu o le atunuu. Mafutaga alofa inoino. E faapena foi i totonu o Ekalesia. O le a le manaia o se mafutaga faavae i le alofa ma le fealofani, a e 'ai filofilo ai lava ma le tiapolo ma ana 'au, taumafai e faatupu le fe'ino'inoa'i, faatupu vevesi ma maseiga, ina ia malepe ma taapeape se mafutaga.

I le vaega o le molimau a Ioane o i le Tusi faitau, ua a'oa'o ai e Iesu i ona soo, ina ia latou malamalama i lo latou valaauina e avea mona soo, ma ona tuatuaiga. O lo latou ola faatasi, mafuta faatasi ma savavali faatasi ma Iesu, o le a latou fetaia'i ai, ma le ituaiga soifuaga lea: o le alofa-inoino. E alofagia i le tasi itu, a e inosia foi i le isi itu. E fetaia'i ma mea lelei, se olaga e tumu i faamanuiaga; a e fetaia'i foi ma mea leaga, se olaga e tumu i puapuga ma sauaga. E faapefea? Aisea e alofagia ai, aisea foi e inosia ai? A o ai e alofagia, o ai foi e inosia i latou? E tele mafuaaga, a o nisi nei manatu o le failauga:

Muamua, o le avea ma soo o Iesu, o se meaalofa maua fua mai le Atua; o se faamanuiaga faapitoa mai lona alofa tunoa. Ua filifilia faapitoa le au soo, o le au faifaiva o le Vai o Kalilaia, e avea ma fai faiva i tagata. Ua faae'e i ai le tiute, e vaai ma faalogo ia Iesu lo latou Alii ma le Taitai. O i latou o auuuna, e mulimuli atu ia te Ia. O lo latou valaauina, lo latou filifilia i lea tofiga, ua vavae ese ai i latou, ua faapaiaina, mo le galuega paia. O le aso ua avea ai ma soo, ma aposetolo, o le aso foi lea ua amata savavali ai ma Iesu, i se auala e fou, e ese mai le soifuaga sa masani ai.

Ua fetalai Iesu i le poloaiga sili, e iloa ai e le lalolagi, o i latou o ona soo. E iloa i le alofa. Ia latou fealofani. "*O le mea lea e iloa ai e le lalolagi o o'u soo outou, ina ua outou fealofani.*" O mafutaga ma valaauina faavae i le alofa. E pei ona alofa le Atua le Tama, ia Iesu o lona Alo pele e toatasi, e faapena foi ona alofa Iesu i ona soo. Ia faapea foi ona latou alolofa atu ia te Ia, ma alofa le tasi i le isi.

Lua, o le valaauina e fai ma soo o Iesu, o le avea lava lea ma sitiseni o lona malo, le malo o Keriso, le

---

Malo o le Lagi, le Malo o le Atua. O fea e i ai lea Malo? Fai mai Iesu ia Pilato, i lona faamasinoga, “*E lē mai le lalolagi nei lo’u malo. Afai ana mai le lalolagi nei lo’u malo, po ua tau a’u auaua, ina ne’i tuuina atu a’u ia Iutaia.*” O soo o Iesu, e ui lava ina latou ola ma nonofo ai i le lalolagi, i fanua ma laueleele o Palesitina, ma fai ma tagatanuu o le malo Iutaia, a e ua valaauina e ave a ma sitiseni, o tagatanuu o le malo o Iesu. O le taimi lava e ave a ma soo o Iesu, ua liliu mai le lotu Iutaia, a e ua faatuatua ia Iesu, o le taimi foi lena e suia ai o latou sitiseni, e sui ai le faigamalo, latou te auai ma tautua ai. O latou tino e i le lalolagi nei, a o latou loto ma agaga, o meatotino o le malo o Keriso, e pule ai Iesu, latou te faia foi le finagalo o Iesu.

Ua le o toe mulimuli i le faavae o le malo Iutaia, lea e faamamafa ma faataua le tausi o tulafono, tausi i tu ma aganuu faaIutaia, e faaolaina ai. A ua suia i le talia o Iesu, faatuatua ia Iesu, o Ia na auina mai e le Atua le Tamā, ona faaolaina ai lea. Tau lava o le faatuatua. E ola matata’u, e alolofa, e amiotonu ma faamaoni. E loto maulalo ma agamalu, e tausi i le filemu ma le nofo fealofani i aso uma.

Tolu, o le ave a ma sitiseni o le malo Keriso, o le a inosia ma itagia ai i latou e le lalolagi. E inosia, auā na muamua inosia Iesu Keriso, o le Ao o le Malo o le Atua. E ala ona inosia Iesu, ona ua afio mai o Ia, ua na liliu atoa le ituaiga soifuaga sa masani ai le lalolagi, ma fialia i ai tagata—o le olaga e faamamafa mea faaletino, e faataua mea e pala ma mea e toe mavae atu. Ua feliu’i atoa e Iesu, ma na faalēaogaina. O le mafuaaga lea na inoino ai le lalolagi ia Iesu. Ma o le a inosia ai foi ma ona soo.

O isi mafuaaga na itagia ma inosia ai Iesu, ona o lona lē ‘alo ‘ese, mai lona a’oa’o atu o le finagalo moni o le Atua. Sa le’i ‘alo lona leo faaperofeta, e ui ina inosia ma itagia ma lamatia ai o Ia; sa le’i teuteu lumafale foi pe a fesaga’i ma tupu ma tamalii a o tagata amio pi’opi’o, a e na Ia ta’utino atu i soo se tagata, le amio e tataua ona lafoa’i, ma le olaga e tataua ona ola ai. Sa Ia faamalosi e tautala atu ina ia fai le amiotonu a le Atua, ia tausisi i le faamaoni ma le fai mea sa’o. Sa ia fai sa’o atu lava i ta’ita’i o le nuu ma le lotu, o le au faresaio, satukaio ma tusiupu, o toeaina ma ositaulaga, ina ia latou liliu ese ia latou pulega sauā, ma faiga pi’opi’o na faapologa ai tagata. O i latou lava nei, sa taulamua i le sailiga o se mailei,

e molia ai Iesu i moliaga pepelo, ina ia faasalaina ai o Ia.

Ua atili le ita ma le lilivau o Iutaia, ina ua fai atu Iesu, o Ia o le Atalii o le Atua; o le Atua foi o lona Tamā. Aemaise, na latou fai ane o Aperamo lo latou tamā, ae fetalai Iesu, na muamua ona i ai o Ia, a e le’i fanau mai Aperamo. Ma isi a’oa’oga e tele a Iesu, faasino i lona faiā, o le la’ua sootaga vavalalata, ma le la’ua mafutaga mafana ma le Atua, sa le’i taliaina e Iutaia, na latou lilivau ai, ma saili auala e fasiotia ai o Ia. Ma o le a faapea foi ona latou fai i ona soo.

Le Ekalesia pele a Iesu Keriso ma le mamalu o le au faitau Sulu Samoa, o le valaauina o le uluai au soo o Iesu, o lo tatou valaauina foi lea, ina ua faaolaina i tatou i Lona maliu, ma faatuatua ia te Ia. O faamanuiaga uma foi, o le ave a ma soo o Iesu, ua tatou tufi tautua mai Lona alofa tunoa. A o lo tatou savavali faatasi ma Ia, ma fai Lona finagalo, Lana amiotonu ma Lona alofa, o le a inosia ai ma i tatou e le lalolagi.

A ua faamanatu mai le feau o le Tala Lelei, ina ia tatou faamalolosi e faatino o tatou tiute faa soo moni, e ola matata’u i le Atua, e fai lona finagalo, fai lana amiotonu, i le faatinoga o tatou tiute. Pe tatou te inoino i le Atua ma ona ala lelei, a e tatou alolofa i le tiapolo ma fai auala leaga ma auala pi’opi’o o le lalolagi. Ina ia tatou loto tetele ma onosa’i, i tiga ma puapuaga e oo mai, ona o le ave a ma soo o Iesu, e ave a ma itutino o lana Ekalesia. I le faatinoga o tofi ma tiute ua valaauina ai. Ne’i o tatou ‘alo i le ata o le niu, ma faafitia o tatou tiute faa soo, ona tatou pelogia lea o Ia, i a tatou folafolaga ua uma ona fai.

O loo faasolo pea nisi o galuega tetele masani, e pei o le Faamati i lena masina, ma le Fono Tele i ona tala atu, ma faasolo ai pea lava seia tauluga i Faiga Taulaga i le faaiuga o le tausaga. E tofotofoina ai lo tatou ave a ma soo moni o Keriso, auā e lē faigofie, e lē taugofie, taulaga osi o le Malo Keriso. Ua i ai nisi ua faavaivai ma solomuli, ua malo le inoino nai lo le alofa. A o lo tatou tali atu lea i le alofa mai o Keriso, ua na muamua alofa mai ma faaola mai. O lea lava foi tautua, o tofotofoga foi e iloa ai le auro moni, o sitiseni faamaoni o le malo o Keriso. E lē po le silafia, o le isi lea mafuaaga tele o le solomuli ese o tagata lotu EFKS, ma o atu i isi tapuaiga e faigofie ma taugofie. O loo tatou ola faatasi, a o loo inosia mai i tatou i a tatou tu ma aga faaEFKS, aemaise o a

---

tatou osiga taulaga faaEFKS; latou te inosia, auā latou te lē taliaina, latou te lē talitonuina, latou te lē gafatia foi ona faatino. ‘Aua tatou te faapei o i latou na ua solomuli ese; o i latou na o lala o le Vine, ua le mafai ona tumau ma pipi’i i le Vine, ua tatau ai le sala’eseina. “10 O ona po ia e tausui ai tagata e toatele, e faalata le tasi i le tasi, ma feitaga’i i latou. 11 E tutu mai foi perofeta pepelo e toatele, latou te faasese foi i tagata e toatele. 12 E maalili foi le alofa o le toatele o tagata, ona ua tupu tele le amio leaga. 13 A o le tumau seia oo i le gataaga, e faaolaina lea. 14 E tala’iina atu foi lenei tala lelei o le malo i le atu laulau uma, e fai ma molimau i nuu uma; ona oo mai ai lea o le gataaga.” Mataio 24.

A o lea lava foi le soifuaga sa soifua ai lo tatou Alii i le lalolagi nei, a o latou ola faatasi ma le au faresaio, satukaio ma toeaina o le lotu lutaia. Na latou inosia o Ia, ma latou molia seia oo lava ina latou faasatauro ia te Ia, ma le manatu a tanumia lona tino, ua mate ifo ai ma le Tala Lelei na Ia afio mai e aumai, ma ia faamuta ai lona malo na folafola mai. Peitai, o lona toetu manumalo mai le oti ma le tuugamau, o le manumalo a’ia’i lea o le alofa nai le inosia, o le manumalo a’ia’i foi lena o lona malo e faavavau, o lana pule faatupu e aoao lava lea; o le manumalo foi lea o soo se kerisiano faatuatua, soo se auauna tautua faamaoni o lona malo e tumau se’ia oo i le i’uga. Ia i le Atua le viiga e faavavau. Amene.

**(Saunia e le Faatonu Sulu Samoa)**

## **OSIGA FEAGAIGA A LE EFKS LOTOFAGA**

O le Aso Tofi 27 Mati na osi ai le feagaiga a le EFKS Lotofaga ma lo latou faifeau, susuga Kapeni Pene Matatia FS ma le faletua ia Renolla. Na ta’ita’i le sauniga mamalu e le Toeaina o le Pulega Lepa ma Lotofaga, a o le feagaiga taulagi a le EFKS Matatufu, susuga Faasalafa Alaovae FT. O le susuga Malo Afi’a FS (Aufaga) na faitauina le Tusi Paia, o Uaea Isaraelu FS (Saleapaga) na saunia talosaga, a o Dr. Tavita Maliko FS (Lepa) na saunia le lauga. O le afioga i le tamaitai tiakono, le afioga i le tamaitai Palemia, Hon. Fiame Naomi Mataafa na saunoa fai ma sui o le Ekalesia e molimau i la latou faiga filifiliga. Na ia ta’utino foi lo latou nofo sauni e galulue faatasi ma le susuga faafeagaiga ma le faletua, e atia’e le galuega a le Atua mo le faaolaina o agaga, ma fa’auau le

galuega i totonu o le afioaga, mo le viiga o le suafa o le ALII o Iesu Keriso le Ao o le Ekalesia. Na tali fuaitau le susuga i le faifeau ia Kapeni fai ma sui o le la’ua aiga, e faaleo le agaga faafetai i le Atua ona o lana tofiga e fa’aaogaina ai le soifua mo ana feau. Na ia ta’ua o le aso 19 Ianuari, na taunuu atu ai le valaau a le Aulotu i Lotofaga, na la’ua taliaina ai ma le lotu faafetai ona ua afe ane le faatofalaiga i o la’ua faatauva. Na ia faafetaia foi le Laulau o le Fono Tele ma le Komiti Tupe mo le avanoa sa galue ai i le Ofisa Tutotonu talu ona i’u mai Malua. Na faafetaia foi le tapuaiga a matua ma aiga, o nuu ma Aulotu a o a’otauina seia oo ina valaauina. Ma na folafola ai foi lo la’ua nofo sauni e fai le galuega ma le lotu maualo, faamoemoe i le fesoasoani mai o le Atua, ma la latou galulue faatasi ma le Ekalesia i le Sa’o Faapito ma le Aiga Salevalasi, le Aliimau o Faleupolu ma le mamalu o le Faleatua, le susuga Sitagata ma le Aiga Sa Sitagata. Na silasila foi le sauniga i le le mamae o le Feagaiga na saunia e le Ekalesia.

O le sauniga na faatumulia i le paia faaleEkalesia, o Toeaina ma le aufaigaluega ma faletua o le Matagaluega APIA, faapea le Matagaluega LOTOFAGALEPAALEIPATA. Na mamalu foi ina ua auai le paia faalemalo i minisita ma faipule, a o le paia o aiganalua ma paaga a le faifeau ma lona faletua, tainane le afioaga o Lotofaga. Na tualuga le sauniga i le Sakarameta paia o le Faamanatuga na ta’ita’i e le faifeau.

O le susuga Kapeni ma le faletua na i’u mai Malua i le tausaga 2021, ona galue lea i le Ofisa Tutotonu o le Ekalesia i galuega tau faamaumauga ma tala faatekonolosi (IT), seia oo ina faauu i le tofi Faifeau Samoa i le 2024. O i la’ua o lupe faalele ma taulaga soifua a aiga ma Ekalesia a o afioaga o Magiagi ma Samauga. Ua sui tulaga i la’ua i le galuega talu ona maliu le susuga i le Toeaina ia Iosefa Uilelea FT ia Tesema 2022, a o avea ma Sui Taitaifono Fono Tele. O le faasologa o le aufaigaluega i Lotofaga sa i ai le susuga Fiatupu Tavai FS ma Taimua, a o tua atu o le susuga Enosa FT ma le Faletua ia Mutaaga/Naito. Mulimuli ane ona afe atu lea o le mamalu tele sa auai, i le taumafataga ma fa’aaloaloga masani ai i aso tetele faapenei. O le susuga Sitagata Tata sa tu tootoo feagai ma le mamalu o le aufaigaluega, a o le tofa i le Aliimau o Faleupolu, Lemauga Fiso Faamotu na feagai ma le paia o aiganalua mulimuli ane. Ona mapu atu lea o le susuga faafeagaiga ma lona faletua, i lo la’ua maota fou na faapaia ia Tesema 2024. Ia manuia le galuega, ma ia i le Atua le viiga e faavavau.

---

# ***TATALA LE MAOTA FOU O LE MAFUTAGA AOAO TINA EFKS, PAPAUTA***

---

***“Afa’i e le atiina a ‘e e le ALII le fale, e galulue fua i latou o e atiina a’e.”***

O le Aso Faraile 7 Mati 2025 i le 10.00 i le taeao, na amata ai le sauniga o le faapaiaina o le maota fou, ***FALE O LE MAFUTAGA TINA EFKS***, i Papauta. O le susuga Tunumoso Soliola Iosia FT, le Taitaifono Fono Tele na ia ta’ita’i le sauniga. Na muamua faafeiloa’i le mamalu o le auvalaaulia, i paia faale Ekalesia, faalemalo ma le atunuu, e le afioga Taitaifono Mafutaga Tina, Faafetai Kereta Fuafiva. Ona valaaulia lea o le susuga i le Taitai o le Sauniga mo le amataina o le sauniga. Na faia le Tatalo amata, ma valaaulia ai le Masiofo a le Afioga i le Ao mamalo o le Malo Samoa, afioga Faamausili Leinafo Tuimalealiiifano Vaaletoa II, mo le ootiina o le lipine e tatala aloaia ai le maota. Sa faapea foi ona valaaulia le afioga i le Agaiotupu, afioga Tuiaopo Faamausili Andrew Ah Liki, o le Pule o le Bluebird Construction Limited, mo le tatalaina o faitoto’a o le maota. Na ulufale le mamalu o le toatele sa faatumulia, ma faasolo le sauniga mamalu.

O le Valaau e Tapuai ai, na lagi fetalia’i ai le Salamo 100, e le ta’ita’i ma le faapotopotoga, ona usu lea o viiga o le Atua i le Pese 2. O le Tina Penisione, Naomi Suafa’i Patu na ia faitauina le Tusi Paia, a o isi Tina Penisione sa latou ta’ita’iina Talosaga. O le Tina ia Sapini Eteuati Pasia na faia le Tatalo Faafetai, o Lauagaia Esera Aumua i le Tatalo Faatoesega, ma Senetenari Toese Peleti Toailoa mo le Tatalo o Manaoga. O le Lauga na saunia lava e le ta’ita’i o le sauniga, faavae i le Manatu Autu o le Tusi Faitau Aso - Faaosoosoina o Iesu i le Toafa.

O le Tala o le Galuega na fofogaina e le Failautusi o le Komiti Faletua Au Toeaina, Susana Papatii Tunumoso Soliola Iosia. Na amata le folasaga a le Failautusi i lona ootoo o le tala faasolopito o le nofoaga, le fanua ma le a’oga i Papauta. Ona ia saunoa lea i le afuafua mai o le faamoemoe o le Mafutaga Aoa Tina, mo so latou Fale Tele; peitai o le faafitauli o le leai o se fanua e faatuina ai. O le aso 16 Me 2019, i tualumaga o le Fono a Tina i le Fono Tele o lona tausaga, na aloaia ai le Foai mai e le Sosaiete Teine Papauta Tuai (TPT), le Fanua ma le Fale tuai sa i ai i Papauta, mo le Mafutaga Aoa Tina EFKS, e fausia ai le Fale Fou.

O le faasologa mai o le galuega:

31/5/2024 na tuu ai i lalo le fale tuai o le TPT, le maota ua loa lana tautua i le Ekalesia.

3/7/2024 na amata sua ai le fanua mo le galuega.

17/9/2024 na tuuina ifo ai le Maa Faavae, ma le Lisi o le Mafutaga Aoa Tina, sa tofu sao i le galuega.

O le faatupeina o le galuega sa faatino e Lala e 3: (i) Komiti Faletua Toeaina, (ii) Tautua Puapuaga Tagata (TPT), (iii) Mafutaga Aoa Tina. O le tau aofa’i o le galuega e oo mai i lea aso, e ***\$8,808,945.79***. Ua uma ona totogi atu i le Konekarate le \$5,100,000. O le Aitalafu o totoe, e ***\$3,708,945.79***.

O le fuataga o le Maota: 70 x 40 x 12.5 mita.

Fogafale Muamua (Lalo): Potu Tele (Hall) & 2 Potu mo le Au Penisione.

Fogafale Lua (Luga): 14 Potu VIP e i ai ma fale taele ma fale le ta’ua i totonu, 2 Potu Fono, ***24 (12 x 2) Potu mo Matagaluega***.

Na saunoa foi le Failautusi ia Susana Soliola, e faaleo le faamalo ma le faafetai a le Mafutaga Aoa Tina, i le Laulau a le Fono Tele, le KFE ma le Komiti Tupe a le Ekalesia, mo le faamatuina atu o meatotino ma aseta, o fanua ma le tamaoai tau tupe, mo le faataunuuna o le faamoemoe o le Mafutaga. Na saunoa faamamafa faapitoa le Failautusi, i le faafetai tele i le afioga i le Agaiotupu afioga Faamausili Tuiaopo ma le Falefa o le Aiga Salemalama, mo le fausia o le galuega; aemaise le folafolaga e faia pea lava seia mae’a lelei, tusa lava pe le lava tupe i lea taimi ma lea taimi. O isi vaega eseese na ta’ua i le agaga faafetai, e aofia ai Asiata Van Wright, Niko, Fuimaono, faapea le susuga i le Komesina o Fanua ma Fale o le Ekalesia, susuga Loia Kolia FS mo le tusia o le Ata o le Fale, ma le tele o lona sao i le galuega. Na ta’ua foi le agalelei e ala i Asiga a Matagaluega, o le Pule ma le Kolisi Faafaifeau i Malua, le Toeaina ia Paul Gray ma Taualogomai, i le tausiga ma asiga i soo se taimi e malaga mai ai i Samoa. O le ‘au’au o le saunoaga a le Failautusi, o le viiga ma le faamanu i le Atua, seanoa lona alofa ma lana tausiga agalelei, e le tau lau o le faamoemoe. E moni le Faisalamo, *“Ana le seanoa le ALII na ia te i tatou...Ia faafetaia le ALII..O lo tatou fesoasoani o i le suafa o le ALII lea.”* Sal.124.

---

O le upu masani, E au le Inailau a Tina ma Tamaita'i; ma na molimauina lea mau, i le tulaga maualuga ma le maoa'e, o saofaga sa faatino ai le faapaiaina o le 'ala ma le mila. O saofaga na sasao e aofia ai le ta'i \$10,000 a Matagaluega uma e 21 a le Ekalesia. O Matagaluega i Samoa na latou saunia le ta'i 20 le Toga tetele ta'i 30 aga pe sili atu, faapea le sae, ma totoga o Sua. O Matagaluega i fafo na latou saunia mai Pusa Pisupo faapea Afifi Meaalofa (Gift Hampers). O le taumafataga tele na tofusua uma ai le mamalu o le au valaaulia i malo fa'aalologia o le Ekalesia ma le Malo, o paaga faapitoa a le Mafutaga Aoa Tina ma le atunuu lautele, faapea le afioga i le Agaiotupu ma le aufaigaluega a le Konekarate. Ma tualuga ai le aso fiafia i fa'aalologia tetele ma le maualuga mo le afioga i le Ao mamalu o le Malo ma le masiofo, o Sui o le Fono Sui Tofia, le mamalu faalemalo, o le paia i Toeaina ma le aufaigaluega a le Ekalesia, faapea le afioga i le Agaiotupu ma le Falefa o le Aiga Salemalama. Ona taape lea ma le fiafia tele ma le loto faafetai, ina ua tau lau o le faamoemoe, ona o le alofa ma le agalelei o le Atua.

## **ULUA'I MAFUTAGA A TINA** **@ MAOTA FOU, PAPAUTA**

E le'i atoa se vaiaso talu ona faapaia le Fale Tele fou o Tina i Papauta, a e fa'aaoga loa mo le uluai taimi, i le Mafutaga a Faletua o Toeaina, Penisione, Faifeau ma A'oa'o I'u mai Malua, i aso 11 & 12 Mati. O le Sini Autu o le Mafutaga o leni tausaga, Salamo 118:1, **Vivii atu ia outou i le ALII, aua e lelei o ia; aua e faavavau lava lona alofa.** O le sauniga lotu na tatala ai le Mafutaga na ta'ita'i e le afioga Taitai Mafutaga, le taitaifono Mafutaga Faletua Au Toeaina, le faletua ia Taualogomai Tu'u'au Gray (Matagaluega VITORIA); o ia foi na taitai le sauniga faai'u e tapunia aloaia ai le Mafutaga. Na saunia Pepa e faaso ma fetufaa'i ai. A o faafiafiaga su'i fefiloi na saunia lelei e Matagaluega na tausoa: Malua ma Vitoria sa saunia le Pese Faafeiloa'i, Faleata ma Aukilani le Siva Ierusalem, Laumua o Aotearoa ma Itu o Tane le siva Fiti, Vaimauga na faatasi ma Niusaelese Sisifo, Aana ma Manukau na faia le Faaevagelia o faamalologa a Iesu, Falealili le siva Tuie. O Mafutaga nei sa masani ona faia i le Fale o Tupulaga EFKS i Mulinuu, a o se tasi lea o mafuaaga na fausia ai le Fale o Tina - ia tapuvaetasi i ai fuafuaga ma faamoemoega o le Mafutaga Aoa Tina o le Ekalesia. Malo le mafuta. Ia manuia le Mafutaga.

## **6. O LE SULU SAMOA MATI 2025**

## **FAAU'UGA 12 A LE** **A'OGA TUSI PAIA**

O le Aso Toonai, 15 Mati na faia ai le Faauga lona 12 a le Aoga Tusi Paia a Malua, o i latou e 95 ua faamanuiaina ma agavaa ai, i le Fale Iupeli i Malua. O le afioga Taitaifono Komiti a Malua, susuga Asotasi Gu Time FT na taitai ma saunia le Lauga. O le Tusi Paia na faitauina e le susuga Anatu Reupena FT (Faatonu Manukau), a o Tatalo na saunia e le susuga Pouniu Faamausili FT (Faatonu Aukilani). O le Ripoti Faaletausaga o le A'oga Tusi Paia na saunua i ai le Faifeau Pule, Porofesa Dr. Vaitusi Nofoaiga FS. O le tauaoina atu o Tusi Pasi sa nafa lea ma le Taitai o le Sauniga, faapea le Faifeau Pule ma le Pule Lua o le Kolisi Malua, susuga Arthur Wulf FS. O le afioga Seumanutafa Nepo Luafau (Tiakono, EFKS Magiagi) na saunua fai ma sui o le au faauu, e molioo le viiga i le Atua e ala i le faafetai i le Taitai o le Sauniga ma le au maufofi, le Susuga i le Alii Pule ma Faiaoga o le Kolisi Malua, faapea le tapuaiga a aiga ma uo, a o latou alo faiva i sailiga malo i aso e tele. O Pese ma Viiga na saunia lelei e A'oa'o ma Faletua o le Kolisi. O le sauniga na faatumulia i le Ekalesia, o aiga ma paaga a i latou na faauu, e le gata o i latou sa a'otauina i Samoa nei, a o e na a'oa'oina i fafo. Ma na tualuga lea aso i le tausamiga tele ma fa'aalologia na saunia e le Kolisi, i le Fale o Tina i Tuvao.

O suafa nei o le au faauu 2025:

### **Certificate in Theological Studies - Level IV:**

1. Asi Vitale Ioane Finau, Tiakono, EFKS Mangere Bridge
2. Asiata Tagaolo Iosefatu Wright, Cornertone Church
3. Atonio Manu AF, EFKS Satuimalufilufi
4. Avamoia Siliva Pulepule Fanolua, Tagata Lotu
5. Crystal Hikurani, Tagata Lotu EFKS Lalomalava
6. Faanimo Feanu Tu'i, Faletua Tk, EFKS Sandringham
7. Fasia Sinafoa Nuuea, AF EFKS Saleimoa
8. Fata Mafutaga Iakopo, Tagata Lotu
9. Fiaaiti Urima Iosua Tavita, Faletua AF, EFKS Blockhouse Bay
10. Fiatamalii Tautiepa, Faletua A'oa'o I'u Malua
11. Gagaeolo Afaese Farane, Tagata Lotu
12. Georgina Samasoni, Faletua A'oa'o I'u Malua
13. Iosefa Fili Tiliga, A'oa'o Malua

14. Lavender Tuipoloa Samuelu, Tagata Lotu
15. Lefee Asiata Siaoisi Pusa, AF EFKS Aleisa Sisifo
16. Lesa Ati Tuivasa, Tagata Lotu
17. Maatulimanu F. Mulinuu, Faletua AF, EFKS Pakuranga
18. Maiava Hipiasa Tolovaa, Tagata Lotu
19. Makerona Lokeni, Tagata Lotu
20. Mata'utia Seve Keilani, AF EFKS Penisula o Petesa
21. Mati Peniata Elive, Tagata Lotu
22. Matila Mose Kalati, AF EFKS Otahuhu
23. Maui'a Vaapu'u Vitale, AF EFKS Mt Roskill
24. Moanatuhi Ruatesi Tokuma, Tagata Lotu
25. Mouaana Milo, Faletua Faifeau EFKS Otahuhu
26. Naomi Uialatea Pelesala, Tagata Lotu
27. Oseteria Piilua, Tagata Lotu
28. Otto Lealofi, Tagata Lotu
29. Ruta Rotoiti Alenepi-Finau, Faletua TK EFKS Mangere Bridge
30. Salataima Futi, Faletua Faifeau EFKS East Tamaki
31. Samanai Iosua Tavita, AF EFKS Blockhouse Bay
32. Sarai Tuileisu Tokuma, Tagata Lotu
33. Seiuli Daniel Savaiinaea, Tagata Lotu
34. Sema Lemafa Faatafe, Tagata Lotu
35. Simoli Ama, Tagata Lotu
36. Soonafelotea'iupuoaga Sivaialua L.I. Finau, Tina Ekalesia EFKS Mangere Bridge
37. Sovita Avaoletaeao L. Ioane, Tina Ekalesia EFKS Mangere Bridge
38. Su'a Vaetoeafaga Meki Tauai, AF EFKS Papa Sataua
39. Tafa Iakopo, Tagata Lotu
40. Tagaloa Sauilemau A. Kiripati, Tagata Lotu
41. Taliaoa Efaraimo Tusani Sanerivi, Tagata Lotu
42. Toe Mala, Tagata Lotu
43. Tovaleinu'upule Palemia T. Reupena, Faletua o le Toeaina, EFKS Samalaeulu, Itu o Tane.
44. Tualapalapa Sipili Leaupepe Tiedemann, Faletua o le Tiakono, EFKS Apia.
45. Tuivaiti Maamora Taulapapa, Tagata Lotu
46. Tumanu Beracah Futi, Tagata Lotu
47. Tumanuvao Amosa Latu Taalo, A'oa'o Fesoasoani, EFKS Mangere Bridge
48. Uialatea Ao Pelesala, Tagata Lotu
49. Ulufia Fetu, Tagata Lotu
50. Vavao Vaialia, Tiakono EFKS Blockhouse Bay
51. Vitoria Tanoi Ofisa-Tavana, Tagata Lotu.

**Diploma in Theological Studies -  
Level V.**

1. Agneta Alauni Faletua A'oa'o I'u Malua
2. Akenese Faatau Faletua A'oa'o I'u Malua
3. Alovale Mafuolo Faletua A'oa'o I'u Malua
4. Annette Leausa-Lefao Faletua A'oa'o I'u Malua
5. Beta Laban Faletua A'oa'o I'u Malua
6. Ema Masoe Faletua A'oa'o I'u Malua
7. Faafofu Leuta Faletua A'oa'o I'u Malua
8. Faasalua Toleafoa Faletua A'oa'o I'u Malua
9. Faleulu Tusi Faletua A'oa'o I'u Malua
10. Faotui Tuifao Faletua A'oa'o I'u Malua
11. Fereti Leota Mamoe, Tiakono EFKS Peteleema Fou
12. Fofoaivaoese Malaga, Faletua A'oa'o I'u Malua
13. Fuapepe Sititi Faletua A'oa'o I'u Malua
14. Helen Neria Faletua A'oa'o I'u Malua
15. Josephine Salevao Faletua A'oa'o I'u Malua
16. Josephine Tini Faletua A'oa'o I'u Malua
17. Lauoi Lisa Aiva Faletua A'oa'o I'u Malua
18. Lautasi Apelu Faletua A'oa'o I'u Malua
19. Lefau Sooalo Faafetai Apelu, A'oa'o Fesoasoani EFKS Matautu Uta.
20. Lise Iati Faletua A'oa'o I'u Malua
21. Liuasi Anae Faletua A'oa'o I'u Malua
22. Lomi Mark Tomane, A'oa'o Fesoasoani EFKS Vaivase Tai
23. Luafata Gasolo Faletua A'oa'o I'u Malua
24. Manutagi Laifaga Faletua A'oa'o I'u Malua
25. Matalaoa Faafofu Faletua A'oa'o I'u Malua
26. Moevasa Reti Faletua A'oa'o I'u Malua
27. Nevada Poutasi Faletua A'oa'o I'u Malua
28. Norah Utufua Faletua A'oa'o I'u Malua
29. Pauniasi Ioane Sao, Tiakono EFKS Matautu Uta
30. Peata Manila Faletua A'oa'o I'u Malua
31. Peniamina Lei Sam, A'oa'o Fesoasoani EFKS Aleisa Sisifo
32. Rosehill Su'a Faletua A'oa'o I'u Malua
33. Rossana Vaoaiga Maualaivao Tanielu, Faletua A'oa'o I'u Malua
34. Sela Tala Lapana Faletua A'oa'o I'u Malua
35. Silive Muaau Faletua A'oa'o I'u Malua
36. Taufua Falana'i Faletua A'oa'o I'u Malua
37. Tauva Esera Faletua A'oa'o Fesoasoani EFKS Saipipi
38. Toeseanuupotopoto Tautalagia, Faletua A'oa'o I'u Malua
39. Tuala Sooalo Otilia Sooalo, Tagata Lotu EFKS Samauga ***(faauma itulau 15)***

---

# ***O LE PEROFETA MULIMULI***

*(O le Tala Faafagogo ua FaaSamoaina mai le Tusi, "The Last Oracle", tusia e James Rollins)*

E tatau ona ia talitonuina lona sa' o.

"Na sau Sasa ia te a'u!" na valaau atu ai Karai. "Na ia su'ea mai au. Na ia ta'ita'i mai i matou iinei ona e i ai se mafuaaga."

Na tosotoso loloa le sãõ. Ona tautala mai lea o se leo filemu. "E faapefea? E faapefea ona taitai mai e Sasa outou iinei?"

Na tofotofo e Elena o ia.

Na manava malosi Karai. Na ia si'i a'e lana auupega i luga ma tia'i i ona autafa.

"Piesa..." na gugulu atu ai Koualasaki. "Afai o loo i ai sou manatu e tia'i ese ma la'u fana, lona uiga ua tutusa lo oulua valea."

Na tu a'e i luga Karai.

I le isi itu o latou va ai, na faasino atu ai le fana a le fitafita Rusia ia te ia. Na tu foi i luga Elena ma 'ote atu i le fitafita, ina ia 'aua ne'i fanaina se isi. Na fia iloa atili e Elena tala ia Sasa. I le isi itu, na faasoa ai e le pealua Rusia se 'olo o pailona sima. Na fa'aata atu pea e Elena lana fana ia te ia.

Na tali e Karai lana fesili. "Na faapefea ona ta'ita'i matou e Sasa? Na ia tusi ni ata. Muamua na ia ta'ita'i mai le au Kipisi i lo'u faitotoa. Ona ia tusi lea o le ata o le Tahī Mahali, na ta'ita'i mai ai i matou i Initia, le nofoaga na matou iloa ai lou tofi ma lou faasinomaga ma lou tala faasolopito. E te fesili ifo oe ia te oe pe aisea. O Sasa e faapitoa, ua e iloa?"

Na o le faatau pupula o Elena ia te ia i ona mata pogisa ma le tutu'a.

Na faauiga e Karai lena mea o le ioe, ma sa ia fa'auau ai pea, ina ia ona faalogo ma iloa le moni o ana upu. "Aisea na auina ai i matou i Initia? Aisea na aafia ai fua i matou? Aisea i le taimi nei? E tatau ona i ai se mafuaaga. Ou te manatu o Sasa – pe na te iloa pe leai – o loo ia mana'o e taofi le mea o loo oulua fuafuaina e faatino."

Sa le'i faailoa e Elena se faailoga na te faamaonia, peitai o loo ola pea Karai.

"Na ia auina i matou i se auala e maua ai lou faasinomaga: mai le Perofeta o Telefaia, i le Au Kipisi, e oo mai nei. Ou te manatu e i ai se mafuaaga na faatuina ai lou tupuaga. Atonu o le faataunuina o se valoaga tele i se mea mata'utia o le a tupu."

"O a valoaga?" na fesili ai Elena.

Na maitau atu e Karai le emo mai o lona faamaonia faatasi ma lona fefe. Pe mata sa i ai se miti taufaafefe na ofi atu i o latou mafaufauga leaga? Na manatua e

Karai ata fai i tioata sa maua i olo malolosi Eleni i Initia, aofia ai le ata fai i tioata mulimuli sa i le puipui, o se foliga tagata na mumū na ea a'e mai le asu mai le omofalosi. Na aveva e Karai le avanoa na te faamatala vave ai le mea na latou maua, ma faai'u ai i lona fai atu, "O le foliga e pei lava o se tama ma ona mata sa mumū i le afi."

O le fana sa i le lima o Elena na amata ona gatete – e ui ina sa le'i aveese lona faasino tonu i lona fatafata. Na lagona atu e Karai le memumemu e Elena o le igoa e pei lava o Pita.

"O ai Pita?" na fesili ai Karai.

"Piota," na faasa'o atu e Elena. "O le tuagane o Sasa. E fai ana miti taufaafefe i isi taimi. E ala a'e i le faataiõ, tauvalaau o ona mata o loo mu i le afi. Peitai..."

"O le a?" na tauanau atu ai Karai, e ui ina utiuti le taimi.

"Pe a ala mai, ona matou ala uma lea. Mo sina taimi itiiti, matou te vaaia ai Piota o loo mu." Na ia lulu lona ulu. "Peitai o lana taleni o le alofa. E malosi tele o ia. Na matou faavasegaina ana miti taufaafefe i se lūlūuga o lana taleni na susulu mai i fafo. O se i'uleo o le alofa."

"E le na o se leo mai ia Piota," na tomanatu leotele ai Karai. "O se i'uleo e alu i tua i le amataga."

A o fea e gata ai?

Na faatau pupula atu Karai ia Elena. "E te lē manaomia moni lava le mea o le a oo mai. Sa manino lava e le'i mana'o i ai Sasa. Na ia aumaia a'u iinei. Pe ana fai e mana'o o ia e faataunuu le fuafuaga a Nikolao, na pau le mea na te fai o le filemu 'aua le pisa. Peitai sa le'i faapea. Na ia aumaia a'u ia te oe, Elena. Ia te oe. I le taimi lenei ma mea ua tutupu nei. E i ai lou avanoa e te fesoasoani ai ia Sasa, pe talepe le mea na ia amata. O lau filifiliga e fai."

Na fai lava i le taimi lena le filifiliga a Elena, atonu pe na fanau mai i le afi o mumū i lona fai'ai. Na ia taamilo i lona vaematua ma faapa le fana. Na pa'ū ifo le leoleo Rusia, ua maliu.

Na faatopetope atu Karai ia Elena. "E faapefea ona ta taofia le Fuafuaga Uranusi?"

"E te le mafaia," na ia tali atu ai, o lona leo ua pei e gase, atonu ua vaivai mai le faafuase'i ona feliiua'i o tiute, pe atonu foi ua ala mai i sana miti ua leva ona fai.



---

Na tuu atu e Elena le fana ia Karai, e peisea'i ua na iloa le mea e alu i ai. Ua amata ona sosolo atu i ona autafa ma alu ese atu i le va o piitaga i auala. Afai e le iloa e Elena taofi le Fuafuaga Uranusi, atonu e iloa e Nikolao.

“E tatau ona e faanatinati,” o Elena lea. “A o a'u... Atonu ou te iloa se auala e fesoasoani ai.”

Na ia liliu ma vaaia atu i le itu i tua o le fausaga, le mea sa aga'i i ai Nikolao i le amataga.

Na faasino atu Karai i le pasika. E ui ina ua pa mafolafola le pa'u i luma, a e sili atu ona saosaoa nai lo le savali. “Koualasaki, fesoasoani ia Elena.”

“A o ia lina na fanaina a'u.”

Sa le'i i ai se taimi e finau ai Karai. Na ia liliu ma tamo'e saosaoa i le togavao o pailona simā. Na matala mai le auala i luma, sa laina faaitu alalua ai alapa'u. I le taunuuga o le auala, na ia vaaia ai Nikolao o setusetu atu i totonu o se faitoto'a va tele i le puipui uamea telē, ma ninimo atu i le pogisa.

Na tamo'e tuli tatao atu Karai i le auala.

Ua toe ono minute.

A o ia lele atu, na ia iloa atu le pulou uliuli i le puipui uamea ua amata ona va apiapi. Ua tapuni le faitotoa.

Na latou sosola ese mai le fale puipui, peitai e faapefea le taimi nei?

Na tamo'e atu Elisapeta i tua o Rosauro, a o mulimuli atu ai Luka ma na puipua o la tua i le fana. O Matesone na ia fa'aaoga lona tootoo e setusetu malosi atu ai i autafa o Elisapeta. Na fesoasoani atu i ai o ia i lona taofia o lona tulilima.

O la latou faamuamua o le su'e o se telefoni ma faaleo se faailoilo. Peitai o le aai atoa ua tuufua ma pei o se nofoaga o aitu. Ua vaoa, ola ai laau tutupu solo, a o fale ua ufitia i vao ma limulimu. E faapefea ona latou maua se telefoni o loo ola i lenei ituaiga nofoaga?

“O le isi magāala!” Na mapuea atu ai Matesone ma faasino atu lona tootoo a o osooso i lona vae lelei.

“I le itu agavale. E i ai le Faletalimalo o le Polisia i le faatausi'usi'uga o le isi poloka.”

Na fautuaina e Matesone le nofoaga. A o le faletalimalo lea, sa teuteu ma toe faalelei mo le fiafia sa fai tala atu anapō, ma na fa'aaoga i le taeao nei o se nofoaga e faamautu ai taavale e feavea'i ai malo na valaaulia mo le sauniga.

A e faapefea malo e le'i valaauina?

Na taia i le vaai a Elisapeta ia Karai ma Koualasaki a o la'ua felelei atu i le pasika i le la solaaga. Na ia

faamoemoe o loo manuia ma saogalemu i laua, ma la mafai ona taofi le tamaloa leaga. A o alu le latou solaaga, na ia lagona le tiga o lona ulu ma ona mata ua vaivai. O le fefe ma le popole na atili ai lona vaivai. “Ou te faamalie atu, Elisapeta,” na musumusu atu ai Matesone.

Na tepa atu le tamaitai i le alii. Na ia iloa o loo tau faatoese atu o ia i se mea e sili atu ona ogaoga, nai lo le aafia o i latou i lenei solaaga.

“Ou te le'i talitonu o lou tamā sa i ai i se tulaga lamatia,” na ia faamatala atu ai. “Sa ou manatu o le manaoga o Rusia i le galuega a Atipale, na o se mataupu tau atina'e i faiga faasipai, o le gaoiga o faamatalaga. E leai ma so'u manatu e ono oo ai i lona maliu.”

E ui lava ina sa ia malamalama i le tulaga o le polofesa i le tuanai, ma na amanaiaina le lamatia faavaomalo i le taimi nei, na te le o lagona se fia faamagalo atu ia te ia. E le ona o lona tamā, e lē ona o le aafia ai o i latou uma e aunoa ma so latou malilie i ai. Ua ia fiu i mealilo – a lona tamā ma le tamaloa lenei.

A o latou latalata atu i le magaala, na laa mai le faitotoa ni fitafita Rusia se toalua. Na togi ifo i lalo e le tasi lana sikareti i le eleele ma soli i lona seevae. O le isi na faasino atu lana fana ia i latou ma valaau faaRusia.

“Kake tepia savuta?”

“Tuu mai ia te a'u,” na fai atu ai Matesone ma talo atu ia Rosauro ma Luka ina ia tuu i lalo a la'ua auupega.

Na faasa'o e le polofesa lona pulou pa'epa'e ma toto'o malosi i lona tootoo. Na ia laa atu i luma ma ote atu faaRusia, “Topilaue utaro!”

Na tautala manino Matesone. Na pau upu na malamalama ai Elisapeta o le Taimi Lonetona. Atonu o loo fai atu Matesone o latou o tagata tusitala o le nusipepa.

Na tuu ifo i lalo e fitafita a la'ua fana. “O outou o tagata Peretania.”

Na lue le ulu o Matesone ma ataata malosi. “E te lua tautala Igilisi. Lelei tele. Ua matou leiloa le ala e toe foi ai i le Fale Talimalo o le Polisia. Pe e te lua agalelei a e faasino ma ta'ita'i atu i ai matou.”

Mai le fegenoa'i o laumata o fitafita, e iloa ai ua la'ua malamalama. Na fa'aaoga e Matesone lo la'ua faanunumi i gagana e faalepaleni ai la'ua, ina ia 'aua le tuliloaina le latou faanoi. Peitai o le fitafita sa i ai le fana, na ia manino i ona tiute.

“Polisia Kositineti?” na ia fesili ai.

“Ta! Tama lelei lea. E mafai ona e aveva matou iina?”

---

Na fetautalatala’i faaRusia le pealua. Mulimuli ane, na faamimigi tau’au o le tasi, a e liliu le isi ma le lue o lona ulu.

O latou tua ane, na ‘e’ē faataiō mai ai le leo o se pasika, na taia ai le filemu o le aai. Mamao ese i le auala, i le itulagi o le falepuipui, na feliiua’i mai ai se pasika ma ona moli lanu moana emoemo faailoilo, o loo tietie ai ni fitafita se toa lua ma o la pulou fulumanu. Ua maua i latou. Na lagona atu le tauvalaau mai leotele faaRusia ia i latou.

Na faafuase’i lava ona tu faamalō le pea fitafita i o latou luma.

“Ua tupu le faalavelave,” na fai atu ai Matesone, ma tulei atu Elisapeta i le auala. “Tamo’e!”

Na taavili Rosauo i lona seevae ma kiki atu foliga o le fitafita na lata ane ia te ia. Na gauai ponaivi, ma pa’ū i tua. Na si’i ane e le isi fitafita lana fana, peitai sa vave atu ai le minoi a Luka i lana fana. Na pisi le toto mai le tau’au o le fitafita, na autafiti e pei sa a’a e se asini, a o lana fana na salalau solo pulu o le otometi, agai ia i latou.

Na taavale atu Matesone ma pupuni Elisapeta, a o Luka ma Rosauo na faapa’u’ū faō i le auala.

Na pa’ū atu le polofesa i le tua o Elisapeta ma taia ai o ia i lalo i ona tulivae. Na toe pa le fana a Luka, ma uma ai le pa pa o fana.

Na sosolo ese Matesone mai le tamaitai ma taatia atu i luga o le auala. Na faalogoina e Elisapeta le patatū o pulufana i le tino o le tamaloa. Na taavale Matesone i lona itu a o faaputu le toto i ona lalo ifo. “Eitena!”

Na ia talo atu e alu ese, a o taofi pea lona tootoo. “Alu!”

Na patapatatū mai le pasika aga’i mai ia i latou.

Na si’i malele a’e e Roauo le tamaitai.

O Luka na ia tafana atu le pasika, peitai sa mimilotū i tua atu o taavale ma otaota e lafi ai. Na tafana mai pulu e le fitafita sa nofo i le taavale pipi’i i le pasika, ma taia solo i le alasavali i o latou autafa.

“Faamalie atu, Elisapeta,” na toe fai atu ai foi Matesone, a o tafe mai le toto i ona laugutu.

“Eitena...” Na pupuni e Elisapeta lona gutu, ina ua le iloa se upu e faafetai atu ai, faamagalō atu ai ia te ia.

Ui i lea, na iloa atu e Matesone i mata o Elisapeta, ma na avatu ai se lue itiiti o lona ulu e faamaonia ai, faatasi ma lana ataata, ua malie. “Alu...,” na ia fai atu ai, a o moeiini ifo ona laumata.

Na tulei atu Elisapeta e Rosauo i le auala agai i le isi magaala. O loo tafana limatasi pea e Luka ona tua a o ia tamo’e – ona matala mai lea o le itu o lana fana, ua uma ana pulu. Ona tuliloa lea e pulu salalau.

Na taitai e Rosauo i latou i autafa o le auala, seia oo ina pupuni i latou e se loli elea mai le pasika. “Taamilo i le pioga!”

Peita’i ailoga latou te taunuu.

Ua leai nei se fana e toe pa, ona masau mai loa lea o le pasika faasasa’o mai ia i latou.

Na vaai atu Elisapeta i tua o ona tau’au. A o taavili atu le pasika i le va o tagata i le auala, na faafuase’i ona taavale atu Matesone i lana toe manava na totoe, ma sulu atu lona tootoo i le uili pito i luma o le pasika. Na gau le tootoo malō, a e na taavili ma lelea i luga le pasika i ona uili i luma ma pa’u ifo i lalo. Na taia fulifaō ma sese’e atu taia i pito malō o le auala, na feemo solo ai sipaka ma salalau ai masa’a o le toto. Na tauanau malosī atu Rosauo ina ia faavave ese. “Topetope!”

Sa latou faamoemoe o le leotele o le pa’ō o le afi o le pasika na lē lagona ai le pa pa o fana, a e ua tatau ona latou o ese faavave mai iinei. Na taunuu i le magaala ma agai atu ai i le isi aai. Pe a ma le kuata maila le mamao o le auala na tulai mai ai se fale talimalo, malamalama ma fou le vali, o mumū moli. Na i ai ni taavale limo lanu uliuli sa faatali ai i le auala. Na latou faanatinati atu i ai. Na togi ese e Luka lana fana, ma latou taumafai e teuteu faalelei o latou la’ei pei e leai se faalavelave na tupu. Na latalata atu i le fale talimalo ona faatelegese lea, peiseai o latou ni tagata e nonofo ai. E leai se isi na fesiligia i latou. Sa tele ina gaogao le fale, na o ave taavale sa feaoa’i solo ai. Sa i ai foi ofisa faigaluega o le fale talimalo na galulue ai i kesi. O le toatele o tagata o loo i se sauniga.

Na fesili atu Rosauo i le laulau i luma. “E i ai se telefoni se’i matou fa’aaoga? O matou... matou te faatasi ma le nusipepa o le Taimi Niu Ioka.”

“O le potu o tagata faasalalau... i le itu le la,” na tali mai ai se alii matamoe tau panupanu le Igilisi. Na ia faasino atu i se faitotoa lata ane.

“Sipasipō,” na faafetai atu ai Rosauo. Na ia taitai atu i latou i le faitotoa. O le potu e faatafafa ma se fata e faalava atoa i totonu. Sa i ai se laulau o i ona luga mea faaofisa: pepa, peni, mea faapipii pepa. A o le mea na tosina ai le vaai a Roasuro o le lua taseni o telefoni uli sa taatitia ai i le fata i le puipui.

---

Na savali atu Rosauro i se tasi telefoni ma tuu i lona taliga faatali mo se leo. Na lue lona ulu i le fiafia. A o ia vili le numera na ia fai atu, “O le a ou logoina le ofisa tutotonu. O latou e faasalalauina le tala ma amata ai le aveesea o tagata.”

Na goto ifo Elisapeta i se nofoa sa i ai. I le malū lē tumau ua i ai nei, na amata ai ona ia gatete. Sa le mafai ona ia taofi. O le maliu o Matesone...na pei e motusi ai se mea i totonu o ia. Na amata ona maligi ma tafe ifo ona loimata – i le loto nutimomoia mo le polofesa, faapea foi ma lona tamā.

Na uma ona vili le telefoni a Rosauro ona faatali lea. Na amata ona iloa ona foliga toatama’i, ua pipii faatasi ona laumata.

“O le a le mea ua tupu?” Na lūlū lona ulu, ua popole. “E leai se tali mai.”

12.50 taeao. Uosigitone.

Na tu’itu’i lemū atu Penita i le faitotoa o le potu loka ma tulei atu ma le faaeteete. Na la’ua feiloai ma le gutu o le fana i lona muaulu. Na tuu ifo i lalo e Kati le fana, o ona mata ua to’ a.

“O a mai outou?” na fesili ai Penita ma mulimuli atu i le tamaitai.

“O loo lelei, e oo mai nei.”

O se alii Sigima na alu ane tu i le tulaga o Kati i le faitotoa. O Kati na taitai Penita i totonu o le potu autu, na laina ai le faaputuga o loka ma fata uamea. O tua sa i ai ala sitepu i lalo e tau atu i fale ta’ele ma taelega fa’aafu.

Na taitai atu atu o ia e Kati i se auala tuaoi. Na maua atu ai Malakoma i luga o se faanofoa, ma Lisa o nofo i luga o le fola, o ona lima o loo opoopo ai Sasa. Na vaai a’e le teineitiiti ia te ia i ona mata lapopo’a lanu moana ma luelue lemu. O lana vaai na maua atu le pupula a Kati, ona filemu ai lea o lona tino atoa.

Na tu i luga Lisa. Ua sui ona laei i se pea fou o fusiga, ua le toe vaaia se palapala. Na punou ifo Kati, piki atu Sasa, ma laua nonofo faatasi i le nofoa. Na ia musumususu atu i le taliga o le teine, na ataata lemu ai o ia.

Na sulu atu Lisa i totonu o lima o Penita, ona pulato’a lea i ona mata mo sina mānava. “O le a le mea ua faalētonu?” na ia musumususu atu ai, ua popole. Na manatu Penita ua ia natia faalelei, peitai o ai na te mafai ona faalafi atoatoa le ita ma le faanoanoa o faatumulia ai o ia i le taimi nei?

“O Seana,” na ia fai atu ai.

Na tau fai tepa uma atu Kati ma Malakoma ia te ia. Na manava tele i totonu Penita. “Na fasioti e le meaola o ia.” Na ia faalogoina pea le pa o le fana, le lave ma tifatō, o lana uo a o ia vaai atu i ai.

“O i, le Atua e.” Na memumemu ai Lisa ma sōsō latalata atu ia te ia.

“O loo agai mai Mapeletope i lalo i inei, o loo saili le teine.” Na siaki e Penita lana uati.

Na maitau atu e Kati le popole o le alii. “O le sefe-toilalo?”

“Ua seti mo le fa minute.” Na tatalo Penita ua mautu mea uma sa ia fuafua. Ua faatumulia le ‘ea i le manogi suamalie o mea faatelevave.

“Pe afai e tatau ona tatou puipuia le potu,” na fesili atu ai Kati, “E tatou te popole i le pa pa o fana e apo ai e le ‘ea le afi?”

Na lulu lona ulu. “O le tuufaatasiga e gaiioi e pei o le C4 faaliu ‘ea. E na o se aloiafi faaeletise malosi e mafai ona ia faamumū, a e lē o se emo o se afi.”

Na tu pea Lisa i ona autafa. O le a la le tatou mea e fai, mai iinei?”

Na talo atu Penita ia latou tutū i luga. Na ia mana’o e puipui malu i latou. Na te le mana’o e toe mamulu ese se isi. A e leai se mea tele na te ofoina atu.

“E tatau ona tatou lalafi.”

Na mulimuli atu Mapeletope i lana au fitafita i lalo i le potu tele. Na ia faafaigaluegaina le vaega lenei i le tele o taimi muamua, o se vaega’au o fasioti tagata e aofia ai fitafita tuai o vaega’au Peretania, ma au a Aferika i Saute. O lona maso malosi lea i soo se itu o le lalolagi faapolokiki. Latou te lē faafiti pe ‘alo ese mai se galuega e tuu atu i ai: fasiotiga o tagata, ave faamalosi, faatigaina, sauaga matagā. O a ituaiga faalavelave na te mana’o e faatino, o le vaega’au lenei e faatino. A o le mea e sili ai, e uma lava se galuega ona mou ese atu lea, e leai ma se isi na te iloa, pe su’esu’ea, ua na o ni aitu e leai se isi e silafia. O ituaiga tagata ma’a nei e faatumauina le saogalemu o le atunuu. O mea e fefefe le toatele e fai, o fitafita nei e lē solomuli pe faafiti ai.

O le fitafita na ta’imua ua taunuu atu i se faitotoa i le tausī’usi’uga o le potu tele. Na i ai se faailoilo, POTU LOKA. Na ia si’i a’e lona lima i luga. I le isi ona lima, na ia taofi ai se masini eletise su’esu’e.

Na faatali le ta’ita’i i sana faatonuga e fa’auau ai.

Na talo atu Mapeletope ia te ia mai le faitotoa. Na ia siaki lana uati. O le toilalo-saogalemu na seti mo le isi tolu minute. *(E faia pea...)*

---

## O LAU AFIOGA O LE SULU I O'U VAE

### POTOPOTO & MAFUTA FAATASI

*“42 Ua tumau pea i latou i le a’oa’oga a le au aposetolo, ma le mafuta faatasi...” Galu. 2.*

O le faia’oga Matematika Eleni e igoa ia Euclid, na soifua mai i le senituri lona fa talu ona soifua mai le ALII. E ta’uta’ua i lona atamai, e faalupe o le tamā ia o le mataupu tau kiometeli (geometry). O se tasi o mau faakiometeli faaonaponei e faavae i ana tusitusiga ma faamaonia i ana su’esu’ega e faapea, ‘O le mea atoa, e sili atu ona telē, nai lo le aofai po o le faaopoopoga o ona vaega’ (The whole is greater than the sum of its parts). O se tasi faaupuga e faamatala ai lenei mau e faapea, ‘O se *mea* e tupu i se kulupu e lē tupu na o ia’ (something happens in a group that doesn’t happen alone.’ O lena *mea*, e ta’ua o le ‘suneki’ (synergy). E sau mai le upu Eleni o le *sunergia*, o lona uiga, o le felagolagoma’i po o le galulue faatasi. Sa faatino e le Ulu’i Ekalesia i le Feagaiga Fou le faiga lenei. *“41 Ona papatisoina lea o e na talia lana (Peteru)upu ma le fiafia; o lea aso foi ua faaopoopoina ai pe tolu afe o tagata. 42 Ua tumau pea i latou i le a’oa’oga a le au aposetolo, ma le mafuta faatasi, ma le tofitofiga o le areto, ma talotaloga.” Galuega 2.*

O loo faamatala e Iesu le ‘suneki’ faaleagaga i lana fetalaiga, *“19 Ou te fai atu foi ia te outou, Afai e loto gatasi se toalu o outou o i le lalolagi i se mea la te ole atu ai, e faia lea mo i laua e lo’u Tama o i le lagi. 20 Auā o le mea ua potopoto ai se toalu, po o se toatolu i lo’u igoa, ou te i ai faatasi ma i latou.” Mata.18.* E le’i faailoaina e le Agaga Paia mea uma i se tagata e toatasi (vaganā le Alii o Iesu na o Ia). Tatou te a’oa’oina ma tutupu a’e faalefaatuatua, ina ua tatou potopoto, ina ua mafuta ma o mai faatasi. O le soifua matua ma le malosi faaleagaga e tupu i itu e lua: (i) Ina ua e naunau e faasoa atu i isi, mea ua a’oa’o mai e le Atua ia te oe. (ii) Ina ua e naunau e a’oa’oina mai, mea ua a’oa’o e le Atua i isi.

Ia manatua le mau a Luka faasino i Kerisiano i Perea: *“11 Ua sili ona amio lelei o i latou nei i tagata Tesalonia; auā ua latou talia le upu ma le fiafia tele, ua saili Tusi i lea aso ma lea aso, pe moni ia mea. 12 O le mea lea ua talitonu ai i latou e toatele lava, ma sa’o tamaitai Eleni, atoa ma tane e toatele.” Galu.17.*

O faapefea lou ola mafuta faatasi ma faasoa faatasi ma isi? Afai e lē o malosi, o lona uiga ua e faatapulaa lou ola tuputupu a’e faalefaatuatua, ma ua e melea ai le tele o faamanuiaga a le Atua. O la latou Ekalesia, o le Ekalesia Faapotopotoga, e potopoto faatasi, mafuta ma faasoa faatasi i mea uma, faaletino aemaise le faaleagaga.

### E AMANA’IA OE E LE ATUA

*“7 Ia tuuina atu ia te Ia mea uma tou te popole ai, auā o loo manatu mai o ia ia te outou.” I Peteru 5.*

O Salesa Ueigale (Charles Weigle) o se faifeau faievagelia Amerika e fiafia tele e fealua’i ma faimalaga solo e lauga ma tala’i le Tala Lelei, e ui ina tele lava i le gaoā o le ala na te uia. Peitai, o lana avā, na faasolo ina lē mautonu ma lē fiafia ona o le tu’ua soo na o ia a e alu le faifeau e tala’i. O se tasi aso na foi mai Salesa i le fale ma maua ai se tusi e faapea: ‘Salesa, sa avea a’u ma vale. Ua uma a’u ma le tele o mea... mai iinei e oo i fafo, ua ou maua le tele o mea ua mafai mai le lalolagi o loo aitalafu ia te a’u. Ou te iloa o le a fa’aauau pea le avea o oe ma vale mo Iesu, peitai o a’u, ua ou faatofā atu!’

Na faate’ia le alii faifeau, sa taia ma ufitia o ia i se sunami o faanoanoaga tele. O se tasi aso a o nofonono o ia i le polotito o lona faleoo, na faaosoosoina o ia e pule i lona ola. Na malosi le leo mai totonu sa faapea mai, ‘Ua uma lau misiona, ua gata lau galuega. E leai se tasi e kea, e amanaia ma manatu mai ia te oe ma lau galuega.’ Peitai sa i ai se isi leo na tuia ma emoemo mai i totonu o le pogisa: ‘Salesa, ou te le’i faagaloina oe; ou te tausi ma manatu atu ia te oe.’ O le taimi lava lea na tootuli ifo ai Salesa i ona tulivae, ua faamaulalo faatoese, ma toe tuuina atu lona loto ma lona ola ia Keriso.

Mulimuli ane ona ia tusia lea o se tasi o Pese lotu, se Pese lauiloa FaaEvagelia: Ou te fiafia e ta’u atu le mea ua ou iloa ia Iesu, Ina ua ou maua ia te ia se uo e alofa atoatoa; Ou te ta’u atu lona suia atoa o lo’u olaga, Na ia faia se mea e le mafai e se isi ou te iloa; E leai se isi e alofa mai e pei o Iesu, e leai se uo agalelei pei o Ia; Leai se isi e aveese le agasala ma le pogisa, O i se alofa ina tele ua na fa’aalia.

*(“I would love to tell you what I think of Jesus, since I found in Him a friend so strong and true; I would tell you how He changed my life completely, He did something that no other friend could do. No one ever cared for me like Jesus, there’s no other friend so kind as He; no one else could take the sin and darkness from me, o how much He cared for me.”)*

E toatele le aufaigaluega e pei o Salesa. E alu le olaga atoa o tautua, e mafatia ma tigaina i le ola auauna, tautua ma osi taulaga mo le Tala Lelei. E le gata o le galuega faafaifeau tausi nuu, a o le tele foi o isi galuega a le Ekalesia i ona ofisa ma a’oga. A e oo ane i le faai’uga, e fetaia’i ma faanoanoaga ona o le tali mai a isi tagata; e pei o le lē amanaia, ua lē aloaia, ua faailoga ese, ma teena ai faamanuiaga o loo maua e isi uso faigaluega. E faasoosoina e pei o Salesa i le pule i le ola, o le liulotu, po o nisi gaioiga tau ma sui. Peitai, e pei o le Pese na tusia e Salesa, ua faapea foi ona faamanatu mai le tele o Pese ma Viiga malie, e faamafanafana ma faalototele e pei o: *Tumau i le Alii, Aua e te popole, Na te le tuua oe, E faatasi mai pea, E ia te oe le manumalo moni, Pe a e valaau atu mo ia (Be Strong in the Lord, faaSamoa e June Ryan). PS 351, Ia tia’i ia le fefe, Soia le faavaivai, Ua silafia lou tagi, E le alofa mai. Tiga le agi tele, Matagi ma afā, Ia e faatuatua, E toe iloa le la.*

Pe afai foi ua aafia ma afaina ai lou soifua tautua i le Alii, ua faamafanafana mai le Afioga a le Alii, ina ia ‘aua le atuavale pe popole i faai’uga e fai e tagata, aua o tagata e vaivai, e i ai taimi e faasoosoina ai i le tau ma sui, manatu faapito ma faaitu’au. A ia e faatuatua pea i le Atua na te silafia lou afu sisina ma lou tautiga i lana galuega, o Ia na te faamanuia ma tauia. “58 O lenei, o’u uso pele e, ia outou tumau ma le lē faagaetia, ia alualu lo outou faamalosi i le galuega a le Alii ma le le aunoa, ina ua outou iloa e le se mea faalēaogā lo outou tautiga i le Alii.” 1 Kori 16.

*“7 Ia tuuina atu ia te Ia mea uma tou te popole ai, auā o loo manatu mai o ia ia te outou.” 1 Peteru 5.*

*“20 Ua maua a’u e i latou na lē saili mai ia te a’u; ua fa’aalia a’u i e na lē fesili mai ia te a’u.” Roma 10.*

O le mau lea a Isaia 65:1 i le Feagaiga Tuai, o loo si’i e le aporetolo e faamatala ai lana mataupu o finauina i lana Tusi ia Roma. A e afai e fesili ane pe se a le uiga o lenei Afioga a le Atua? Ona faapea lea, e ui ina o loo e saili mo ni tali i ou faafitauli i nofoaga sesē, e ui ina e sesē fesili o loo e fesili ai, e ui ina sesē itulagi o loo e faasaga i ai, a e faafelavei lava oe e Iesu; e faaliliu oe ma toe faasagatonu, ma na faamalie ma tali i au fesili. Ma na fa’aogaina ai oe.

O le fafine Samaria na feiloai ma Iesu i luga o le vaieli, sa saili solo mo se tali i ona sootaga ma faiā tau mafutaga. Ua lima ana tane na saili i ai e lē faamalieina, e le’i maua ai se tali e fiafia ai lona loto; o le lona ono lea o ana tane sa la mafuta a o feiloai ma Iesu.

A e le’i feiloai Sakaio ma Iesu, sa ia saili se tali i le ‘oa ma le tamaoiga faalelalolagi. Na ia a’ea’e solo i auala eseese, e faamalieina ai lona mana’o. E ui ina o le tagata mau’oa, e ala i lana galuega faa ao lafoga, a e na ia lagona pea le mativa ma le ausage; sa le’i malie lona mana’o i mea na ia maua. Se’ia oo ina a’e i le sukamoru, ma talisua ma Iesu.

E faapena foi ia Saulo le tamaloa mai Taso; na la’ua feiloai ma Iesu, a o ia saili se tali i lona ola tapuai i le Atua. O lona talaaga faatagatanuu o Iutaia: “5 Na peritomeina i le po valu, o le aiga o Isaraelu, o le ituaiga o Peniamina, o le Eperu o sa Eperū, o la le tulafono o le faresaio a’u; 6 o lo’u maelegā na ou faasauā ai i le ekalesia; o la le amiotonu foi i le tulafono, e le’i mata’uleagaina a’u.” E tutusa i latou uma nei – le fafine Samaria, o Sakaio, o Paulo; na latou saili i mea e faamalieina ai lo latou ausage, a e peitai sa latou le’i maua. O le fafine i le tele o ana paaga, o Sakaio i le tele o ana tupe, o Paulo i le mamapo i le mamalu o lana tapuaiga.

E faapena foi ia te oe ma a’u, ma i tatou uma; e lē mafai e soo se mea ona talia a tatou fesili i mea e faamalieina ai. A o le ā? O se sootaga faiā vavalalata ma Iesu! O loo fetalai mai o Ia ia te oe ma a’u i lenei aso, “10 O le gaoi, e leai se tasi mea e sau ai na ona ia gaoi, ma fasi, ma faaumatia; ua ou sau ina ia latou maua le ola, ia maua atili ai lava.” Ioa.10. O Iesu le tali; nei ma taeao ma aso uma e oo i le faavavau. “Ia outou o mai ia te a’u...”

---

## ASO TATALO O LE LALOLAGI,

7 Mati 2025

Tusi Faitau: Feagaiga Tuai – Salamo 139: 1 – 18

Feagaiga Fou – Ioane 4: 1 – 15

Matua: *Salamo 139:14, “Ou te vivii atu ia te oe, auā na faia a’u e ala ai ona mata’utia ma ofo tele ai; o mea na e faia, o mea mamana ia; ua ou matuā iloa e a’u nei mea. (I praise you, for I am fearfully and wonderfully made. Wonderful are your works; that I know very well.”*

Manatu Autu/Sini Aoao o le Aso Tatalo o le Lalolagi

2025: NA OU FAIA OE IA MATAGOFIE

(I made you wonderful)

O le fai mea matagofie o le Atua, e le’i faato’a iloa ina ua molimau le fatu pese Eperu, e pei ona faamauiina i lana Salamo 139. A e na iloa lava mai le amataga i le foafoaga, i totonu o **Etena**, le fai mea matagofie, le fai mea mae’ae’a lelei atoatoa o le Atua. I le faiga o mea eseese; aemaise lava, e faapitoa lona fai mea matagofie, i le faia o i tatou, **le tagata**, o le palealii o ana foafoaga. E faapefea ona iloa lea tulaga?

Auā o le faiga o isi mea, a uma le aso, fai mai Kenese, ua silasila atu le Atua, ua lelei. Ae ina ua uma ona faia le tagata, ona ia **faamanuia** lea i ai, ma avatu i ai le **pule**; na silasila atu o Ia, **ua matuā lelei lava**. Na o le tagata, na valaaulia ai e le Atua ona peresona e tolu, **O mai ia, ia tatou faia le tagata**. Na o le tagata foi, na faia i le **faatusa** o le Atua, na faia ia **foliga** ia te Ia.

A o le itu e sili ona maua ai, le fai mea matagofie o le Atua, ina ua **agasala** le tagata. A o lalafi le ulua’i tagata, ua lē lavalavā, ua masiasi ona o le agasala. Ona faia lea e le Atua o la ‘ofu pa’u, e **faa’ofu** ai i la’ua. “*21 Ua faia foi ofu pa’u e le ALII le Atua, mo Atamu ma lana ava, ua faa’ofu ai ia te i la’ua.*” *Kene 3*. E maua ofu pa’u, ina ua fasi le **mamoe**, sisina lona **toto**, a e saei mai le pa’u o lona **tino** (*tulou*), e ufiufi ai le tagata ua matagā, ina ia toe faamatagofie.

Ua pese faafetai nei Tavita, fai ma viiga o le Atua, ona o lona faia o ia, ia matagofie. O lana molimau, e ala i lona lava olaga. Amata mai lava, ina faato’a afuafua lona tino, i totonu o le manava o lona tina, a

o tauave o ia i le iva masina. O galuega mamana ia a le Atua, ua la valaauina ai o tatou tino, i tatou le itupā o tina, e fai ma **Etena**, e faatino ai, ma fa’auau ai lana galuega foafoa. O vavega e ofo ai, le fausia o le tagata i le matagofie, i le mea lilo, na o le Atua na te silafia. Fai mai lana fatuga, *Na e ufiufi ia te a’u i le manava o lo’u tina. Ou te vivii ia te oe, auā na faia a’u e ala ai ona mata’utia ma ofo tele ai; o mea na e faia, o mea mamana ia; e le’i lilo lo’u tino ia te oe, ina ua faia a’u i le mea lilo...*”

O le viiga ma le faamanū a Tavita i le Atua, ona ua na foai ia te ia ni foliga matagofie. E pei ona ta’ua e Samuelu (1 Samu.16:12), i lona faato’a vaai i le tama leoleo mamoe, “*o ia foi ua enaena mūmū lona lauulu, ua manaia foi ona mata, ma ua aulelei lava.*” E faatāua e Tavita le matagofie o le tagata, i le itu i le tino; o le matagofie o foliga, o le meaalofa a le Atua.

E faapea foi le matagofie o le tagata, i lona mafauafau a’oa’oina lelei, ia potu ma atamai, i uiga eseese o le olaga nei. Ia na maua le tofa mamao ma le utaga loloto. Ia iloa fai filifiliga sa’o, ma faaiuga tonu. Ina ua fai faatasi ma le Atua. O le auala lena e matagofie ai mafauafuga o le tagata – pe a fesili i le Atua, e pei ona sa masani ai Tavita.

Ae sili ona faatāua e Tavita, le matagofie o le **loto** o le tagata. Le lotu alofa – alofa i le Atua, alofa i isi tagata. Le lotu mamā, lotu lelei, lotu maulalo ma agamalū, lotu faatuatua, amiotonu, faamaoni, ma isi ituaiga lotu lelei ma matagofie ua a’oa’oina ai i tatou e Iesu.

E leai se tasi e atoatoa, o le upu moni lea. E oo lava ia Tavita, na ia faia solitulafono ma agasala mata’utia. Peitai, na ia lagona le salamō faamaoni. Na ia aioi i le Atua, ia **faamagalo** o ia; ma ia faia se lotu mamā, ia faafou se lotu mau, se lotu matagofie mo ia (Salamo 51). Na talia e le Atua, ma na faia ai se lotu e sili ona matagofie mo lana auauna. Auā na Ia silafia, e moni lona **salamō**. O le a le loloto e pa’ū i ai le tagata, e oo lava i ai le alofa saili o le Atua, ina ia toe siitia a’e i luga. ‘Na oo ifo i Seoli’ (Tautinoga Faaaposetolo).

E faapea i le tina utu vai Samaria sa fetaia’i ma Iesu. O le tina na matua’i malepelepe lona olaga, i le tau sailiga o mea e faamalie ai ona mana’oga. Ae ina ua feiloai ma Iesu, na utu ai le galala o lona olaga, i le

---

# O E UA MALILIU

## ALIU FAITAMAI

tino faapea lona agaga. Na toe faia e Iesu lena tina, ia matagofie, mai le malepelepe sa i ai. Ua na faapupula ona mata faaleagaga sa tauaso, faasavali ona vae sa pipili faaleagaga; ua faamagalo, faafouina, ua ta'uamiotonuina. Ina ua inu i le vai e sili ona lelei, ua faatuatua ia Iesu Keriso le Vaiola. Ma ua valaauina ai o ia, e fai mona soo Tina, o le **ulua'i misionare** e tala'i atu le Tala Lelei i nuu ese, i lona aiga ma lona nuu o Samaria. E fai o ia ma mea faigaluega a le Atua, ia faamatagofie ai nisi agaga ua 'elea, ua mamago, ua pala ona o le sese o le Atua o tapua'i i ai.

Le paia e o le Ekalesia, ma le aufaitau Sulu Samoa, i lenei Aso Tatalo o le Lalolagi o lenei tausaga. Ia faamalosia la tatou tatalo, ina ia toatele nisi e faamatagofie o latou olaga, e ala i le salamō faamaoni, ma ia faatuatua faamaoni ia Iesu Keriso le Matagofie o le Atua. Ia fai i tatou ma meafaigaluega a le Atua, e faasalalau le Tala Lelei Matagofie, ina ua faatino tofi ma tiute, i le alofa ma le faamaoni, o le amiotonu ma le onosa'i, le mata'u i le Atua ma fai lona finagalo paia.

Ua toe taumafai nei faigamalo o le lalolagi e saili auala e puipui ai le lalolagi ua lamatia, ma toe faalelei ai mai le faaleagaina. E eseese a tatou taleni, e tofu ma meaalofa, o agavaa ua foai mai e le Atua. Ua faamanatu mai le feau o le Aso Tatalo, ina ia saga faamatagofie muamua i tatou lava, ina ia mafai ai ona tatou faamatagofie nisi mea, ma nisi tagata.

Mo i tatou Tina, o pae ma auli o aiga, o malo, o Ekalesia ma le lalolagi. Ia au pea lau inailau, ia mamao lau faatautaiga, ia potu lau faufautua, ia atamai lau tuualalo. Ua faigata nei aso, ona o le tetele o suiga ua aafia ai le soifua o tatou fanau, ua oo lava i upufai o malo, ma pulega o le Ekalesia. Ua faigata le sailiga o le amiotonu a le Atua. E leai se isi malosi na te faamatagofie mea ua leaga, na o le malosi o le tatalo faatuatua.

Ua fai e Iesu le faaolataga tele e faamatagofie ai o tatou agaga semanū a fano ona o le agasala. E ala i lona maliu tiga i le satauro, ma lona toetu manumalo mai le oti. Pe afai tatou te taliaina i le salamō faamaoni, ma faatuatua i lona suafa paia. Ia manuia le Aso Tatalo o le Lalolagi. Ona o Iesu. Amene.

**Laugaina e Pelesia Toleafoa Vaa,**  
**& Sueileata S. Samoa, EFKS Ola Fou,**  
**KUINISELANI I SAUTE.**

Na soifua mai le tamā ia Aliu Faitamai i le Aso Faraile, 8/4/1966 a e na faamanava e le Atua ana feau i le Aso Gafua 11/11/2024; ua atoa ai le 58 tausaga, 7 masina ma le 4 aso o lona soifua. O ona toe sauniga sa faia lava i lana ekalesia sa tautua ai i Laulii. O a'u lava na faaulufaleina le sa o le tamā ma taitai i ona toe sauniga i le aso 22/11/2024 i le malumalu lava o le ekalesia EFKS Laulii. Sa molimau le tina ia Faalelei i le la mafutaga ma le tamā, ma ia taua ai o se tamā e alofa ia te ia ma le fanau ma galue malosi mo lona aiga. Sa molimau foi lona uso mai lona aiga i Sauano Fagaloa, fai ma sui o ona uso ma tuafafine, ma le Afioaga i le Tiakono ia Talimalie Fa'aaoga, fai ma sui o le aiga o lona toalua i Laulii ma taua ai o se tagata lava e leai se leo a e galue lava i le malosi e gata ai e faatino galuega uma e le gata i lona aiga i Fagaloa, a e o le aiga o lana fanau i Laulii. O lea lava foi le itu sa agai i ai le molimau a le faifeau, e leotele galuega nai lo upu ma tala, auā e le se tagata e tautala a e iloa Aliu i ana galuega sa fai i lona aiga. O le Susuga i le Faifeau Samoa ia Ieti Tofaeono FS na saunia le upu faamafanafana mo le tina ma le fanau ma aiga ua tuua ona o le valaau a le Atua. O au lava foi na taitai i ona toe sauniga i lona oliolisaga tumau ma o matou faatofa atu ai i le Pese Faatofa a le Au Kerisiano, "Talofa uso e, Tofaina oe, Ua sau le itupo e malolo..." Manuia lau Malaga.

**Saunia susuga Pita Toleafoa FS**  
**EFKS Laulii,**  
**Matagaluega VAIMAUGA**

## **FAAU'UGAA'OGA TUSI**

### **PAIA MALUA (mai le itulau 7)**

- |                    |                          |
|--------------------|--------------------------|
| 40. Tutogi Keilani | Faletua A'oa'o I'u Malua |
| 41. Upolu Leapai   | Faletua A'oa'o I'u Malua |
| 42. Urita Afutiti  | Faletua A'oa'o I'u Malua |

### **Certificate in Theological Studies - Level IV** **& Diploma in Theological Studies - Level V**

1. Perenita Vaasili-Faalili - Faletua Faifeau Faiaoga.
2. Seumanutafa Nepo Luafau - Tiakono EFKS Magiagi (o ia sa faia le faafetai).

**ALIU FAITAMAI (ua maliu)**



**Thank you God!**  
*Not only for today, but also  
for everyday.*

**Susuga PATI VILI FT, (Toaina Faatonu LLA), Hon. FIAME NAOMI, & MATALENA**



**Totonu o le Fale o le Mafutaga Tina, (ata a Rev Loia Kolia, na tusia le ata o le fale).**



**Teutupe EFKS, Melepone Isara FS, Kapeni & Renolla Matatia, ma isi @ EFKS Lotofaga.**